

清史列傳

王鍾翰點校

清史列傳

第十二冊
卷四五至卷四八

中華書局

清史列傳卷四十五

大臣畫一傳檔後編一

僧格林沁

僧格林沁，博爾濟吉特氏，蒙古科爾沁旗人。本生父畢啓，四等台吉，以僧格林沁功追封貝勒。初，科爾沁多羅貝勒新吉倫，於順治七年晉封扎薩克多羅郡王，世襲罔替。承襲八次，至索特納木多布齋卒，無子。道光五年七月，得旨，伊族姪僧格林沁作爲索特納木多布齋之子，承襲科爾沁扎薩克多羅郡王爵。十月，襲封，命在御前行走。十二月，賞戴三眼花翎。六年，賞用紫纁。九年，賞穿黃馬褂。十四年，授御前大臣。尋補正白旗領侍衛內大臣、正藍旗蒙古都統。十五年，命總理行營。十六年，授鑲白旗滿洲都統。十七年，賞用黃纁。二十一年，幹珠爾巴諾們罕私開牧場，例得處分，理藩院覈議未能詳細，僧格林沁上疏劾之，上嚴飭更定。二十四年，充右翼監督。三十年九月，密雲屬穆家峪匪徒持械逞兇，僧格林沁奏請查辦，允之。尋授左翼監督。十二月，賞給四團正龍補服，准予穿用。咸豐二年，宣宗成皇帝梓宮奉安慕陵，僧格林沁恪恭將事，賞加三級。

三年五月，粵西逆匪分擾河南，上以京師根本重地，防範稽察均關緊要，命僧格林沁偕左都御史花

沙納等專辦京城各旗營防守事宜。僧格林沁疏陳稽察章程十二條，下所司議行。八月，賊由直隸永年之臨洺關竄正定府，上授惠親王綿愉爲奉命大將軍，僧格林沁爲參贊大臣，御乾清宮親頒關防，並頒給訥庫尼素光刀。九月，赴防紫荊關。十月，賊由滄州竄踞靜海等處，圖竄天津，僧格林沁進軍永清屬之王慶坨，防賊北犯。得旨：「僧格林沁籌備防剿，一切布置，均合機宜。天氣嚴寒，該大臣辛苦備嘗，且捐循士卒，尤能甘苦與共，殊堪嘉尚！著發去御用貂冠一頂、黑狐腿馬褂一件、綠玉煙壺一箇、白玉四喜搬指一箇。」四年正月，移師王家口。適賊由靜海竄至，以有備遂折竄西南。官軍躡追數十里，至牙鎮南，擒斬多名。賞給端多巴圖魯名號。

既而賊踞河間縣屬之束城村，官軍分五路進，賊大潰，南走，追敗之獻縣單家橋、交河富莊驛等處。賊入阜城縣城，並踞附城各村，互爲援應。僧格林沁分飭諸軍進屯東北，自率馬隊繞至阜城迤南，攻克高家莊、宋家莊各賊巢。奏入，「上嘉其調度有方，賞給粵威羅瓦佛一尊、白玉翎管一枝、白玉搬指一箇、黃辯珊瑚豆大荷包一對。尋相度地勢，定期分剿，飭副都統達洪阿由堆村一帶攻其西南，侍郎瑞麟等由連村一帶攻其東北，將軍善祿等進軍杜家場迤南。僧格林沁親將中軍往來策應，遂平堆村、連村、杜家場賊壘，殲斃逆首偁丞相吉文元。餘賊匿不出，誘敗之塔爾頭、紅葉屯，賊向東南竄，遂踞連鎮。連鎮爲河間府東光縣鉅鎮，東西兩岸村落相錯，賊並踞之。圍攻累月，賊恃衆堅守。會綿雨，河水漲發，軍事日棘。奏言：「自六月以來，陰雨浹旬，河水日漲。逆匪蟻聚高阜，我軍地處低窪，該逆死守不出，欲趁水勢另生詭謀。極力籌維，擬挖濠築隄，以水爲兵，設法浸灌。」尋隄工竣，賊數出奔撲，擊走之。九

月，東西連鎮各出數千匪向南圖竄，官軍扼之，賊大挫。自是至十一月，賊勢窮蹙，收復附近各村，遂克西連鎮，其東連鎮賊仍負隅。十二月，飭投降各勇分紮西連鎮及附近之陳莊，極力攻剿，並偵知逆首林鳳祥業已薙髮圖遁。遂刻日大舉進攻，飭都統西凌阿、瑞麟等督帶馬步隊攻其北，侍郎宗室慶祺等攻其南，杭州將軍瑞昌等在河西扼截，立將賊棚焚毀。於是東連鎮亦復，生獲林鳳祥及偽檢點、偽將軍等，賊黨聚殲。捷聞，諭曰：「僧格林沁督兵剿賊，疊著勳勞。此次攻克連鎮，生擒逆首，深堪嘉尚！著加恩封爲博多勒噶臺親王。」伊子乾清門三等侍衛伯彥訥謨祜著在御前大臣上行走。現在畿輔地方一律肅清，著僧格林沁移得勝之師前往高唐州督辦軍務。」

先是，連鎮踞匪分股南竄，踞山東高唐州城，欽差大臣勝保督師屢攻不下。至是，逮問來京，諭軍營領兵大員均歸僧格林沁節制。五年正月，抵高唐，以州城堅固，欲出奇兵勝之，遂飭南面防軍故作疏防狀，賊果疑，夜潛師出，全股南遁，遂復高唐。賊趨在平，踞縣屬之馮官屯。官軍追至，先奪其西面二村，餘黨嘯聚東南隅，恃糧足，開挖地道，圖撲礮臺，以嚴備不得逞。相持久之，乃密決運河之水倒灌賊巢，土墟之中，泥深沒踝。官軍偪近土埰，燒燬賊窟數處，生擒逆首李開芳，並曾授偽職之黃懿端等八名，餘匪無一漏網，遂復馮官屯。奏入，諭曰：「僧格林沁督師剿賊，均合機宜，忠勇之誠，深堪嘉尚！前賞給親王，著加恩世襲罔替，並賞坐肩輿。伊兄三品頂帶台吉郎布林沁，賞作輔國公；伊弟台吉崇格林沁，賞給二品頂帶，並賞戴花翎。僧格林沁著卽挑選精銳官兵，分起南下，並卽馳驛來京，朕見，以慰廬懷。」五月，抵京，舉行凱撤禮，恭繳參贊大臣關防，並訥庫尼素光刀。

八月，充崇文門監督。九月，奏請酌添外滿洲火器營官兵操演陣勢，允之。十二月，調鑲藍旗滿洲都統。六年二月，丁本生母憂，奏請回旗守制，賞假百日，在京穿孝，給銀七百兩治喪。十二月，命充管理溝渠河道，並八旗值年大臣。尋調補正黃旗領侍衛內大臣。七年，署鑲紅旗漢軍都統。八年四月，英吉利兵船駛至天津海口，授爲欽差大臣，督辦軍務。六月，直隸總督譚廷襄海口疏防，礮臺失陷。英船駛入內河，僧格林沁奏參，命解譚廷襄任。七月，辦理大沽、雙港礮臺，並續捐礮位，嚴行設防。數月事竣，賞御用巡幸袍、褂各一件。十月，回京，賜紫禁城坐椅轎。

九年正月，仍赴天津防堵。五月，英船闖入天津大沽口內，毀我防具。尋復駛至雞心灘，直隸總督恆福派員理論，不聽，並先行轟擊礮臺，繼以步隊登岸，督軍力戰，勝之；並轟燬英船入內河者十三隻。奏入，所有辦理海防及接仗各員給獎有差。十二月，回京，上念其功，賞黃馬褂。十年正月，以本年恭逢三旬萬壽，恩賞杏黃色端罩、貂褂，仍赴天津辦防。自二月至五月，兩江總督何桂清等奏言：「英船有北駛之說，命豫爲布置，嚴密設防。」六月，英船百數十艘駛至天津海口，猝於北塘登岸，占踞村莊。時直隸總督恆福專辦撫局，「二」而英人要挾，無定議，並出馬步隊萬餘分撲新河、軍糧城，官軍退守唐兒沽、大沽兩岸，勢甚危急。僧格林沁先後奏入，得旨：「鎮定軍心，妥爲調度。」仍諭恆福辦理撫局。尋復諭曰：「握手言別，倏逾半載。現在大沽兩岸正在危急，諒汝憂心如焚，倍切朕懷！惟天下根本不在海口而在京師，若稍有挫失，必當退守津郡，設法迎頭截剿，萬不可寄身命於礮臺。切要切要！若執意不念大局，祇了一身之計，殊屬有負朕心，握管不勝悽愴！」

時唐兒沽又被英人占踞，大沽礮臺愈危，復奉退守津郡之諭。尋奏言：「回守津郡，必至兵心動搖。現在情形惟有嚴守大沽，設法布置，竭力固守。」得旨：「所奏情形甚有見地。仍當仰體朕心，勿專以大沽爲重。」七月，英人復占踞大小梁子，旋於右岸石縫地方接仗，官軍失利，礮臺被占。擬退守通州，於州城迤南擇要駐紮。得旨：「迅速來京面授機宜。」並得旨：「僧格林沁辦理海防，未能周妥，拔去三眼花翎，革去正黃旗領侍衛內大臣、鑲藍旗滿洲都統。」八月，帶兵留通防守，先派員齎摺入奏，得旨：「該大臣威望素著，能得兵心。著仍領欽差大臣關防，會同瑞麟辦理防剿，並賞還三眼花翎。」尋以英人逐日前進，嚴陣以待，獲英人巴夏里等送京。英人復整隊來撲，官軍退扼八里橋，接仗失利。得旨：「僧格林沁革去爵職，仍留欽差大臣。」九月，和議成，直東及河間一帶土匪蠭起，得旨：「僧格林沁偕侍郎銜瑞麟前往剿辦。」

十月，以山東團練大臣杜翻奏擒匪猖獗，濟寧、兗州、泗水均已被圍，諭僧格林沁俟畿輔肅清，即赴山東節節剿辦。旋奏言：「陸續緝獲土匪，分別正法，各匪以次解散。擬即取道東昌以次南下。」得旨：「抵東後，必須會合兵勇進剿匪巢，以期一鼓蕩平，是爲至要。」尋諭於濟寧、兗州一帶擇要駐紮，先將北路妥爲布置。嗣與賊戰於鉅野之羊山，失利，僧格林沁以瑞麟節節退守，怯懦無能，劾之，上褫瑞麟職。十二月，鄒縣教匪宋繼朋倡亂，僧格林沁督師往剿，勝之。越日，再勝賊於河灘暨后峪地方。十一年正月，擒匪由東平等處渡河，副都統伊興額追至楊柳集，遇伏戰歿。四月，解滕縣圍，克沙溝營及臨城驛，先後殺賊六七千人。

時賊竄鄆城，勾結長槍會匪，圖陷濟寧州屬之金鄉，鄆縣教匪亦恃險不下。僧格林沁次第進攻，疊有捷仗。六月，曹州會匪分股各踞要隘，僧格林沁遣翼長舒通額等分兵進剿，敗賊於曹縣安陵集、濮州田潭，各擒其渠。八月，賊渡運河，自泰安竄濟南，僧格林沁親統大軍躡之。賊聞風東竄，踞孫家鎮，官軍進擊，賊由靳家橋遁青州。九月，襲賊於臨朐縣南，沿諸城至沂水，適黑旗捻首跨河拒敵，分隊擊之。賊合股回抗，追至蘭山之蘭陵鎮，殲焉。奏入，諭曰：「捻匪自入東境以來，雖疊經剿擊，總未大受懲創。此次僧格林沁親督大軍殲除殆盡，洵足以寒賊膽而快人心！著加恩賞還御前大臣，並賞還黃韁。」十月，授正紅旗漢軍都統，管理奉宸苑事務。穆宗毅皇帝御極，諭曰：「僧格林沁受三朝知遇之恩，宣力中外，功勳卓越。現在統兵剿辦教、捻各匪，紀律嚴明，兵民愛戴，朕欣慰之餘，尤深眷系！允宜特沛恩施，用彰殊眷。著賞還博多勒噶臺親王。」旋命管火器營事務。

時大股捻衆由山東高密、壽光、章丘入滕縣，僧格林沁調馬步隊馳紮蘭、嶧，賊西竄濟寧，營總富和等捷於楊莊岡山。十一月，僧格林沁母病，上賞給人蔭，命其子伯彥訥謨祜回收牧，代爲省視。先是，會匪踞壽張迤西，僧格林沁令侍郎宗室國瑞等躡蹤追壓，先取簸箕營，次取竹口圍，而曹州會匪復恃濮州紅川口土圍堅固，意圖久踞。僧格林沁率各軍合剿，越濠攻入，搜斬無遺，陸續毀劉家橋及荷澤郭家唐房老巢。正移營間，定陶縣佃戶屯老巢賊衆潛撲大營，都統西凌阿拒之，賊敗南奔，救出陷賊良民無算。抵大張寺，賊來撲，復擊走之，斃賊千餘，尋復范縣。十二月，捻賊踞鉅野縣境，西凌阿往攻，大捷。其定陶馬家集之賊，遂喪膽逸去。適會匪郭秉鈞等自河西回犯東岸，趨曹郡，僧格林沁由荷澤陳家集

督師乘其後，自崔家壩至黃河南岸，屢挫賊鋒，曹屬漸就蕩平。

同治元年正月，江蘇豐縣擒匪二萬餘，由金鄉犯魚臺，勢張甚。令翼長蘇克金等進攻，力戰，斃賊數千，餘匪奔豐、沛間。二月，亳東擒匪糾合各股悍賊，並長槍會匪，併力西竄。僧格林沁督帶馬隊追至河南杞縣，賊分股來撲，僧格林沁設伏誘之，乘賊撤隊時，馬步齊出，毀賊營七，復攻破趙寨等匪，賊大敗，宵遁。是役也，三路會剿，殺匪萬計。奏入，上嘉獎之。其宵遁之賊向西南窮竄，僧格林沁督率各軍由陳留追抵尉氏，匪踞縣東，擊之，屢有擒獲。匪懼，退入民寨，派隊進攻，匪列陣數里，旋詐退，欲由旁路包鈔，營總卓明阿等整隊以待，至匪迫近，奮力衝入，匪大震，閉寨固守。官軍復設法撤去東面重圍，誘至樊家樓地方，撥馬回剿，槍礮齊施，亳東逸出之餘匪，至是殲焉。五月，補正黃旗領侍衛內大臣。

時山東長槍會匪董智信等竄入直隸東明境，踞沙果寺民寨，蘇克金等馳剿，智信乞降，呈繳軍器多件。其盤踞坦頭集等處擒匪，亦經富和攻克，並招撫被脅者數十圩寨。六月，進攻金樓。先是，教匪邵姚氏踞金樓，並有賊目金鳴亭施其狡謀，攻之不克。至是，僧格林沁督飭各軍剿撫兼施，投誠甚夥，復激勵將弁率以進攻降勇，先擁入賊圩，各軍繼之，與賊巷戰，陣斬邵姚氏及其兩子，並賊目常立身等，餘賊搜殺淨盡，立平賊寨；又乘勢敗賊於邢家圩、吳家廟、營廓集等處，均有斬擒，事平。諭曰：「金樓教匪，荼毒生靈，尤爲頑惡異常。僧格林沁督率官軍，一鼓殄除，實足大快人心。」是月，長槍會匪焦桂昌等復竄曹屬，意在糾合黨與，四出滋擾。僧格林沁檄恆齡剿之，遂擒焦逆，並獲首從各匪戮之；又先後攻克蘭

山之卓山寨、洪山寨及太丘、雙橋集各賊圩。

尋疏言：「各路統兵大臣及督撫大吏，奏報含混，一味搪塞。爲將帥者市恩於麾下，爲督撫者見好於屬員，每以將佐一戰之功，遽行優保。請皇上密派賢員數人，自臣軍營及各路軍營認真密查。又軍務莫急於餉缺，而餉缺蓋由於各省徵收之不足，其中有水旱偏災，賊竄邊境者，不肖州縣藉此措詞。其實災輕之區，良善之民誰未納賦，不過州縣意圖肥己，私徵匿報。道府職司監察，耳目切近，豈無所聞？其中或有喜其逢迎，遂代爲緘默，地方大吏偶有風聞，又念道府情面，姑且容之，直待斷難姑息，始行參革撤任。豈知事已不可收拾？又豈知被劾之官私橐已飽？似此吏治，若各省督、撫、司、道再不設法挽回，嚴定章程，實行懲勸，軍餉何由得充？官方何時能肅？」奏入，諭曰：「督兵大員肯將軍營積弊據實上陳，具見公忠體國，不染習氣，甚屬可嘉！」

七月，命統轄山東、河南全省軍務，並調度直隸、山西省防兵，直隸、山東、河南、山西各省督、撫、提、鎮以下各官，及正白旗漢軍副都統遮克敦布、右侍郎毛昶熙、署漕運總督吳棠，均歸節制。其蒙、毫、徐、宿等處防兵，並一併調遣。八月，大股捻賊竄山東魚臺之羅家屯，僧格林沁親督各軍由河南夏邑馳至，自金山迤東分駐進攻，國瑞從中路直衝賊陣。賊腹背受創，殺賊千餘，追過山梁，又殺賊四五千人。九月，進克張大莊、盧廟、孫老莊、邢大莊各賊圩，擒斬捻首李廷彥、孫彩蘭等。王新莊等各寨均降，毫東捻首宋喜元等亦殺賊歸正。亳州以北，一律肅清。十二月，諭曰：「僧格林沁督兵剿賊，懋著功勳。兩載以來，由直隸、山東以至河南、安徽境內，櫛風沐雨，辛苦備嘗。現進攻亳州各捻匪巢穴，時當

冬令，布屋單寒，殊深廬念！著發去黃面貂尾馬褂一件，交僧格林沁祇領，以示體恤。」

二年正月，捻首孫醜等掠河南鹿邑，僧格林沁派副都統舒通額等擊之，殲步賊萬餘。二月，連克安徽州屬之雉河集、尹家溝賊巢，陣擒捻首韓四萬等。尋偵知巨、捻逃匪李莊，遂派舒通額等會集鄉團圍攻之，賊懼，執其渠以獻。匪首楊瑞瑛、王懷義等先後請降，僧格林沁令翼長全順潛駐王懷義原寨，藉探賊蹤，適捻首蘇天才等誤投入寨，經全順按名弋獲，匪大懼，捻首李勤邦等誘擒巨、捻張洛行，並其子張喜以獻，餘匪悉平。事聞，諭曰：「安徽蒙、亳等處自遭捻患，幾及十年。僧格林沁銳意剿除，卒能將各股捻首擒獲收撫，使積年巨患剋日掃除，洵屬調度有方，謀勇兼備。科爾沁親王僧格林沁著加恩仍以親王世襲罔替，前奉特旨賞用章服等項，並仍准其服用，以示優異。」六月，剿平山東淄川踞匪，並將逃匿大白山之賊悉數擒獲。奏入，上嘉之。尋諭曰：「近日天氣炎蒸，該大臣冒暑督師，運籌決勝，允宜優加賞賚，以獎勳勞。著發去黃辦珊瑚豆大荷包一對，黃辦珊瑚豆小荷包兩箇，翠翎管一枝，白玉搬指一箇，白玉煙壺一箇，玉柄小刀一把，火鏢一把，俟伯彥訥謨祜由隆福寺差竣回京，即令親齎前往軍營，交僧格林沁祇領，並傳諭該大臣爲國賢勞，允宜善自保愛，以隆委寄。」

初，教匪宋繼明之負隅鄒縣白蓮池也，糾黨二萬餘，四出劫掠。當派總兵陳國瑞紮營白蓮池山腰，攻其老巢。賊乘高下撲，陳國瑞揮軍大進，擒賊首劉錦春。副將郭寶昌，伏兵譟而起，立破之。敗匪竄紅山爲死守計，尋糧盡欲遁，國瑞扼其東面，而設伏西南山嶺下，嚴陣待之。陳國瑞督帶本隊，由雲蒙寺先搶山梁，撲入賊寨，將東山、西山之匪衝作兩截，其西山之匪撲竄下山，復經陳國瑞迎擊，據其

寨，隨將東山之匪圍殺殆盡。計凡閱月，鄒縣股匪悉平。奏入，諭曰：「僧格林沁自攻克淄川後，移軍鄒縣，甫經匝月，卽將教匪埽穴擒渠，良由調度有方，用能驅策羣力，深堪嘉尚！」尋以山東地方被賊滋擾，地方荒廢寢多，奏請移民認墾，允之。

十月，擒首苗沛霖糾衆數萬，擾及安徽 蒙城，僧格林沁親督馬步隊馳赴亳州，先克蔣集，擒匪首陳萬福斬之。尋破楊家寨，與陳國瑞等軍會合，攻其南面，絕賊糧道，並破蔡家圩賊營二十四座，復親督大軍，分路並進，其河南賊壘三、河北賊壘五，悉數剷除。苗逆計窮，昏夜越濠出竄，總兵王萬清斬首以獻。逆黨苗景開等均伏法。蒙城圍解。時西洋集踞賊猶負固抗拒，僧格林沁調隊合攻，由西南兩面攻入，擒斬賊首葛春元等，斃賊三千餘名。其葛家圩、魏羣兒等寨悉投誠，淮甸漸就肅清。遂飭總兵恆齡等分往潁、亳及壽州一帶清理圩寨，緝拏匪犯，收復城關，其不遵勸諭者併誅之。先後奏入，得旨嘉獎。

三年四月，疏言：「用兵之道，首貴嚴明偵探，知彼知己，調度戰守，方能合宜。近見各路軍營奏章，每以賊衆兵單爲詞，獲捷之報，絡繹不絕，而賊勢愈衆，蔓延愈廣。總由領隊之員不能確探賊情，賊至不肯迎頭堵擊，賊去又不肯跟蹤追剿，但敷衍出境，卽報勝仗，以少報多，諱敗爲勝，豫爲冒功邀賞地步。握兵符者，既不能身臨前敵，復不詳加查考，率行據稟人告，相沿成習，急須認真整頓。」疏入，上韙之，並命督師皖、豫、楚三省之交，如有似此情弊，一經見聞，卽指名參奏。五月，諭曰：「本年髮、捻各匪竄擾楚、豫交界，該大臣親督所部兵勇，轉戰而前，所向克捷。近日天氣炎蒸，該大臣冒暑督兵，不辭勞瘁。著發去黃紗馬褂一件、金表一對、玉柄小刀一把、火鐮一把、鼻煙一匣、茶葉二匣，派伯彥納

謨祐馳驛親齎前往軍營，交僧格林沁祇領，並傳諭該大臣爲國宣勞，尤宜善自愛護，以隆倚畀。」

六月，江寧克復，諭曰：「僧格林沁在直隸、山東等省，肅清全境，並督師皖北，將張洛行、苗沛霖等股剿滅。近復移紮豫、皖之交，扼剿東竄援賊。該親王忠勇性成，不避艱險，軍麾所蒞，威望允孚。已疊次加恩，晉封親王，世襲罔替。著再施恩，加賞一員勒，令其子伯彥訥謨祐受封。」七月，復諭曰：「該大臣向於蒙古官兵內保舉出力將士，從不肯稍有冒濫。現當江寧克復，所有僧格林沁軍營統帶蒙古馬隊各員，著擇其出力者，酌量保奏，候朕施恩。其該營蒙古兵丁，著加恩賞銀一萬兩，以示體恤。」

時髮捻各匪竄踞湖北之麻城，於縣城南之閔家集築壘二十餘座，僧格林沁派成保帶兵進剿，均克之。郭寶昌一軍並克蔡家畝等處老巢，賊竄河南羅山迤南之楊家店，僧格林沁親督馬隊，乘勝逐北，抵蕭家河，殺賊無算。其竄至上巴河、蘄州之賊，復勾合東竄各匪，屯踞風火山，蔓延數十里。既陣，官軍薄之，賊翻山奔蘄水，逾芭茅街，賊屍盈路。進至土漠河，見沿河叢林中賊壘森布，僧格林沁分軍扼駐，賊首陳大喜等各率伏裹鈔，直撲官軍，復有他賊鈔在官軍之前，陳國瑞直擣中堅，匪衆四潰。越日，達黑石渡，檄令降目黃中庸乘夜襲取賊營，僧格林沁復親督馬隊衝壓，賊震懾，逆首溫其玉、黃文誥等率衆棄械乞降，並擒獻僞端王藍成青，降其衆數十萬人，誅藍逆。

四年正月，河南寶豐縣積匪踞甘露臺、張八橋等處，僧格林沁駐軍寶豐，四路兜剿，飭郭寶昌等偪賊安營，賊擁衆出擊，卻之；復派成保督帶馬隊橫截，使賊首尾不能相顧。賊兵亂。適有別股賊匪蠡擁而至，圖犯總兵何建鰲扼駐塔爾灣之軍，官軍佯退，賊尾襲，兩旁伏起應之，將步賊全數殄除，馬賊竄向

梁窪，棄壘而走，及清涼寺殺賊千餘。另股髮、捻賴文光等因各軍堵截，糾衆折向南竄，圖陷魯山。僧格林沁督飭恆齡等軍越山追剿，抵魯山城下，賊突出馬隊撲城，既復拚死回關，餘賊潛襲後路，官軍合圍，賊遂竄葉縣。僧格林沁令勇目從間道引軍設伏，連破賊壘，二三月，^{〔六〕}賊由臨潁復回竄河南信陽，郭寶昌等軍併力截剿，賊遁確山，復親督各軍星夜疾馳，並分接應之軍防賊後路。賊果來撲，陳國瑞督勇力戰，步賊先潰，官軍馬隊從山口突出，賊馬隊亦潰，賊衆遂不成軍。

四月，髮、捻入山東由汶上縣之袁家口，犯及鄆城西北水套一帶，勾結伏莽馬步數萬衆，勢兇悍。^{〔七〕}僧格林沁督師猛進，日連一二百里，再戰再勝之，追至曹州府西北高莊集地方。時官軍重趼羸餓，遇賊鏖戰竟日，力不能支，遂潰。僧格林沁撫循殘卒，退入荒莊，既夜，賊掘長濠困之。全順等請衝圍出，越濠，賊層層包裹。陳國瑞馬隊四千覆幾盡，餘軍與賊不相辨識，長驅並驚於昏黑之中，行至吳家店，從騎半沒。僧格林沁手刃悍賊，馬蹶，遂遇害。內閣學士全順、總兵何建龍與焉。

幫辦軍務杭州將軍宗室國瑞奏入，諭曰：「欽差大臣科爾沁博多勒噶臺親王僧格林沁，於咸豐三年間督師剿賊，疊克臨清、連鎮、馮官屯、高唐州等處，北路賴以肅清。嗣於十年間，整旅南征，轉戰直隸、山東、河南、安徽、湖北等省，掃蕩捻圩，殄除髮匪，擒斬巨逆張洛行、苗沛霖等，不可勝計。軍麾所至，衆望允孚。朝廷以該親王頻年轉戰，士卒疲勞，申諭再三，令其持重；而該親王忠勇性成，視國事如家事，臨陣無不身冒鋒鏑，誓滅此賊而後已。方期天鑒忠忱，克竟全功，長承恩眷，乃因猝遇賊伏，力戰陣亡。覽其死事情形，不禁爲之隕涕！著賞給陀羅經被，照陣亡例，以親王飾終典禮，從優議卹。應得

卹典，該衙門詳察具奏。任內一切處分，悉予開復。准其入城治喪，其靈柩回旗時，著沿途地方官妥爲照料。並派乾清門侍衛克興阿、岳林、恩全、吉淩迅速馳驛前往該營迎護。賞給銀五千兩，經理喪事。准其入祀昭忠祠。其死事及該親王出師省分，均著建立專祠。生前事功，宣付國史館立傳。伊子伯彥訥謨祜，俟百日孝滿後，著承襲親王，該衙門無庸帶領引見。所遺貝勒，即著賞伊孫那爾蘇，以示篤念忠藎之至意。」

同日，復諭曰：「科爾沁博多勒噶臺親王僧格林沁，蒙宣宗成皇帝恩眷，派充御前大臣，管理旗營事務。文宗顯皇帝御極以來，尤加委任。咸豐三年，特命剿辦髮逆。十年督師南下，轉戰直隸、山東等省，於今六載，親歷戎行，靡間寒暑。殄除巨憝，懋建殊勳。功在生民，志安社稷。頃因督戰陣亡，雖已加恩優卹，建立專祠，並入祀昭忠祠，尚不足以崇獎忠藎。國家定制，王大臣中有公忠體國、超衆宣勞者，向有配饗之例。況僧格林沁爲國家宣力，忠勇性成，允宜特沛殊恩，用慰忠魂而昭異數。著加恩配饗太廟，以示朝廷軫念勳臣之至意。」尋賜卹如例，輟朝三日，予諡曰忠。

五月，經國瑞查明戰歿情形入奏，略曰：「僧格林沁忠勇性成，圖報心堅，〔八〕行則身先士卒，戰則親冒矢石，駐則與將士同甘苦，雖嚴寒溽暑，從無少怠。今春僅此窮寇入東，原可稍緩兵力，僧格林沁常言西路回氣未靖，經費艱難，誓欲速滅流寇，以期振旅出關，埽平西域，上紓宸廬，下奠良民。四月二十四日，探明髮捻在曹州府西北高莊集地方，乃督馬隊迎頭截擊，該逆正欲南趨，見我軍大至，賊衆列仗來拒。我軍遂分三路，西路乃諾林丕勒、托倫布、達爾濟領左翼馬隊，陳國瑞、何建龍各領本帶步隊；東

路乃成保、烏爾圖、那遜、春壽領右翼馬隊，郭寶昌領本帶步隊，中路即常星阿、溫德勒克西、高福、富森保各領馬隊，並無步隊。該逆亦分三股迎拒，皆係馬步相兼，其勢甚兇。諾林丕勒、陳國瑞等敵住西哨之賊，惡戰時許，互有傷亡，始將此股擊退。賊去未遠，適中股之賊往撲常星阿之隊，常星阿抵敵不住，遂即撤退。此股馬賊並未深追，急轉馬頭向西路之軍，橫衝而來，西股敗匪見勢復進，二股併進，先將何建龍步隊東哨衝動。正在兵賊亂戰，刀矛並舉，我軍死傷甚衆，賊屍亦復不少。西路步賊蟻聚齊上，以致馬步力不能支，紛紛潰散。是時僧格林沁在後督進，見東路之賊撲我右翼，無力迎擊，即飛馬往督，比及趕到，我軍已退，遂與馬步隊且戰且走。此時僧格林沁若帶勁衛馳赴曹州，未嘗不可遠走，因見我軍傷殘零落，仍欲齊集馬步，再作良圖，是以退紮荒莊。倉卒未計食水，該逆全力來圍，衆軍心怯，僧格林沁猶沿牆開導，使衆穩守。注目四望，憐我將士。詎意該逆奸狡異常，隨掘長濠，衆將復求衝圍早走，僧格林沁終戀敗軍，淚流滿面。時至三更，賊氛愈近，勢將撲犯。翼長全順復以大局攸關，正顏挽請，始允夜行。全順、成保、郭寶昌等護從，僧格林沁囑令馬步竭力殺賊，不必顧我。迨衝出圍牆，未至賊濠，逆衆驚覺，紛紛包裹。僧格林沁猶督令開槍，賊衆應聲落馬者，不計其數。行至賊濠，從人漸少，僧格林沁馬失前蹄，復換馬，又行數里。比時我軍馬步與賊夜戰，槍聲不絕，亂兵中猶聞僧格林沁喊督將士實力殺賊。無如該逆包鈔，愈裏愈厚，將僧格林沁困在垓心。僧格林沁並無少怯，遂抽佩刀，猶能手刃悍賊，不期馬受矛傷，驚逸咆哮，以致落馬，從人追趕，藉馬驚闖得出。比及天明，賊散。詎料僧格林沁即於此地將星隕墜，身受八傷，生顏宛在。此地在曹州府城西北十五里，地名吳家店。此僧

格林沁死事之詳細情形也。」奏入，得旨：「僧格林沁事蹟，前已有旨宣付史館，此次國瑞將僧格林沁殉難情形詳細查明具奏，著一併交付史館，敘入列傳，以昭忠節。」

閏五月，靈樞抵良鄉，命御前大臣景壽前往奠醊。越日抵京，命醇郡王帶領侍衛前往奠醊。上復奉兩宮皇太后懿旨，親臨賜奠。長孫那爾蘇，得旨，所襲貝勒，著加恩作爲世襲罔替；次孫溫都蘇，得旨，賞給輔國公。六月，諭曰：「我朝歷屆辦理軍務，凡功勳卓著之臣，均於告成後，圖像紫光閣，以彰懋績。現在南北各路軍務雖未告歲，而如僧格林沁之勳績昭然，本應在繪像之列。今乃中道戰歿，未獲目睹成功，追念彌深，著注！僧格林沁著先行繪像紫光閣。」繪成，御製贊曰：「雄藩懿戚，夙懋忠勇。轉戰疆場，奇勛克鞏。傷哉馬革，遽隕將星。秘芬配食，闕表圖形。」七年七月，上以捻匪蕩平，諭曰：「原任欽差大臣科爾沁博多勒噶臺親王僧格林沁，自咸豐三年督師剿捻，疊殄巨憝，懋著勤勞。同治四年四月間，在山東曹州剿賊，乘勝逐北，中伏捐軀。前已疊降恩旨，從優議卹。現在捻股蕩平，逆首次第伏誅。因思該親王忠勇性成，齋志以歿，惓念殊勳，倍深愴惻！僧格林沁著加恩賜祭一壇，派盛京工部侍郎奕慶前往致祭，用示篤念盡臣至意。」

光緒十五年，慈禧端佑康頤昭豫莊誠皇太后歸政，奉懿旨：「科爾沁博多勒噶臺親王僧格林沁於咸豐、同治年間，疊平寇亂，功在旂常。前經從優賜卹，并圖形紫光閣配饗太廟。該親王身後榮名，已足昭垂千古。現在歸政屆期，追念前勳，允宜特沛殊恩，以示優異。僧格林沁著於京師建立專祠，春秋致祭。」尋遵旨，建顯忠祠於安定門內。